

Aatsitassanut ilinniarfiup Nunatta kujasissortaani immikkoortortaqaqfeqalersinnaanera pillugu Naalakkersuisut misissueqqullugit peqquneqarnissaannik Inatsisartut aalajangiiffigissaattut siunnersuut.

(Inatsisartuni ilaasortat Knud Kristiansen aamma Gerhardt Petersen, Atassut)

Akissuteqaat

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

Siullermeerinnineq

Aatsitassarsiornermik Ilinniarfiup Nunatta kujataani immikkoortortaqaqfeqalersinnaaneranik Naalakkersuisut misissuinissamik peqquneqarnissaannik Inatsisartut aalajangiinissaannik siunnersuuteqartut siunnersuuteqarput.

Aatsitassarsiornermut Ilinniarfiup Kalaallit Nunaanni Teknikimik Ilinniarfiup/Tech College Greenlandip ilaatut Sisimiuni maannakkut inissisimanerani ingerlatsivimmi ataatsimi illoqarfimmilu ataatsimi assammik suliaqartarnermik ilinniarnertit ilagaat. Taamatut aaqqissuussinerup kinguneraa ilinniarfiup inuussutissarsiutit immikkoortuannut ilisimasaqarfittut ingerlatsivittullu atuunna. Aammattaaq assammik suliaqarnermik ilinniarnertit taamatut katersorneqarneranni ilinniartitsisunut ilinniartunullu iluaqutaasumik pisut imminnut pitsaasumik sunneeqatigiittarput, tassa ilinniakkat sammiviisa akornanni siunnersueqatigiittoqarsinnaammat isumassarsianillu paarlaasseqatigiittoqarsinnaalluni. Aammattaaq ilinniarnertit imminnut assigiittut katersorneqarneranni ilinniartitsisunik, teknikkimik sulisunik, allaffissornermik, ilinniartut inaannik, ininik ilinniartitsiviusunik il.il. isumalluutunik pitsaanerpaamik atuisoqarpoq.

Sisimiut avataanni immikkoortortamik pilersitsilluni Aatsitassarsiornermik Ilinniarfimmik siammaaneq ilaatigut ininik ilinniartitsiviusunik, ilinniartut inaannik, allaffissornermik, sungiusarfinnik aamma atortunik immikkut ittunik akisoorujussuarnillu il.il. pilersitsinermut annertuunik aningaasartuuteqarnermik kinguneqassaaq. Tamanna pissusissamisoortutut Naalakkersuisut isiginngilaat. Aatsitassarsiornermik Ilinniarfik aatsitassarsiortut suleqatigalugit pikkorissartitsinernik ullumikkut aaqqissuisinnaavoq, taamaalilluni aatsitassarsiortunut tunngatillugu taakkulu atortui atorlugit ilinniartitsisoqarsinnaalluni taamaalillunilu pilersitsinermi annertuunik aningaasartuuteqarnissaq pinngitsoorneqarsinnaalluni. Taamatut suleriaaseqarneq naleqqunnerpaatut Naalakkersuisut isigaat.

Maannakkut akuersissutinik pissarsimasunik marlunnik aatsitassarsiortoqarpoq, taakkulu Nunatta kujataata avataani inissisimapput. Aatsitassarsiorsinnaanertit sumi inissisimanissaat imatut nalorninartigaaq ilinniarfiit inissisimaffissaannut tunngaviliisinnaanatik. Aamma inuussutissarsiutitigut ilinniartitaanerni tamarmiusuni pikkorissaanertit sapinngisaaq tamakkerlugu najugaq qimannagu ingerlanneqartassapput tamaalilluni pikkorissartut tamaasa sumiiffimmut allamut allartingikkaluarlugit pikkorissartitsisoq/-sut kisiisa angalatinneqarsinnaammata.

Taamaammat Nunatta kujataani Aatsitassarsiornermik Ilinniarfiup immikkoortortaanik pilersitsisinnaanermik misissuinissamik Naalakkersuisut peqquneqarnissaat Naalakkersuisut

isumaqatiginngilaat. Naalakkersuisut isumaqarput Aatsitassarsiornermik Ilinniarfiup Kalaallit Nunaanni Teknikimik Ilinniarfiup/Tech College Greenlandip ataani Sisimiuni inissisimamera pitsaanerpaajusoq.

Qulaani taaneqartut tunngavigalugit Naalakkersuisut inassuteqaateqarput Nunatta kujataani Aatsitassarsiornermut Ilinniarfiup immikkoortortaanik pilersitsinissamut periarfissat misissorneqarnissaanik Naalakkersuisut peqquneqarnissaannik aalajangiinissamut siunnersuut Inatsisartut akuerissanngikkaat.